



10. marts 2026

UPA 2026/144

Inatsisartut Suleriaasianni § 36 malillugu apeqquteqaat aallaavigalugu oqallinnissamik imaattumik siunnersuuteqarpunga:

Maani nunatsinni ikiaroonartumik atuinerup pinaveersaartinneqarnissaanut, annikillisinneqarnissaanullu suliniutit suut aallartittariaqarnerigut, matumani aamma ikiaroonartumik nunatsinnut eqqussinissaq qanoq pitsaaliussaneripput pillugit, apeqquteqaat aallaavigalugu oqallinnissamik siunnersuut.

(Inatsisartunut ilaasortaq Karen Marie Kyed Frederiksen, Demokraatit)

Maani nunatsinni ikiaroonartumik atuineq inuiaqatigiinni asuliinnaanngitsumik unammillernarpoq. Atuisut ataasiakkaat kisimik eqqorneqarneq ajorput, aammali ilaqutariit, meeqqat, suliffeqarfiillu eqqorneqartarlutik. Unammillernartoq tamanna imak annertusisimatigaaq, iliuuseqartariaqalerluta.

Inuttut ajornartorsiuterpaalunni ikiaroonartoq pisooqataasoq nalunngilarput. Tamanna atugarissaarnermut, ilikkarsinnaanermut, sulisinnaanermullu sunniuteqarpoq. Inuit ilatsiinnarnermiiginnarsittarpai, tarnikkullu nappaateqaleratarsinnaaneq annertusisarlugu. Ilutigisaanik atornerluineq, pinerluttuliortarnerlu ataqatigiikkajuttartut akulikippallaamik takusarparput. Inuiaqatigiinnut meeqqanut, inuusuttunullu toqqissimasunik sinaakkuteqartitsinissaminnik pilersitserusuttunut naleqqutinngilaq.

Demokraatit isumaqarput, unammillernartup taassuma pimoorunnissaanut ileqqorissaartumik iliuuseqarnissatsinnut, politikikkullu pisussaaffeqartugut.

Ikiaroonartup nunamut eqqunneqarnissaata pitsaaliorneqarneratigut, pinaveersaartitsineq aallartinneqartarpoq. Akitsuuserinermi isumalluutit ullumikkut killeqartorujussuupput. Illoqarfippaalunni sulisut ikitsuinnaapput, sumiiffiillu ilaanni nunatarujussuarmi sulissalluni akitsuuserisoq ataasiinnaasarluni. Ilutigisaanik ilaatigut Kujataani nakkutilliineq killeqartoq, scanneruteqanngitsorlu aqqutigalugu ikiaroonartumik annertuumik nunatsinnut eqqussisoqartoq tusartuatarparput. Pinaveersaartitsineq oqaluuseriniarlutigulu, eqqussinermi nakkutilliineq taamak sanngiitsiginera akueriinnarniarutsigu ilumoorsinnaanngilaq.

Kisianni ikiaroonartumik akiuiniarneq eqqussukkanik nakkutilliinerinnarmut tunngassuteqanngilaq. Paasisitsiniaanermut, siusissumik iliuuseqarnermut, katsorsaanerimullu aamma tunngassuteqarpoq. Iluatsittumik ingerlatsissagutta atuarfik, angajoqqaat, sunngiffimmi sammisassaqtitsiviit, isumaginninnermi oqartussat, peqqinnissaqarfillu qanimut suleqatigiinnerisigut tamat isiginnissuseqartumik periusissioartariaqarpugut.

Meeqqat atuarfiani siusissumik pinaveersaartitsineq annertusassavarput. Angajoqqaat meeqqaminnik



oqaloqateqarnissaannut pitsaanerusunik sakkusaqartissavagut. Inuusuttut sunngiffimmi neqeroorutininik, ataatsimoorfinnillu isumalinnik atugassaqartinneqarnissaat qulakkiissavarput. Atornerluisullu piukkunnartumik piaartumik katsorsartissinnaanissaat qulakkiissallutigu.

Massakkut suliniutigisarput naammannersoq imaluunniit nutaanik, siunnerfeqarnerusunillu suliniuteqarnissaq pisariaqarnersoq, politikkikkut eqqartueqatigiinnissatsinnut piffissanngorpoq.

Tamanna pillugu Inatsisartut tulluuttumi apeqqutininik eqqartuissasut kissaatigaara:

1. Ikiaroornartumik eqqussuineq pitsaaliorniarlugu suliniut qanoq annertusisinnaavarput, matumani pitsaanerusumik nakkutilliineq, teknologi, aaqqissuussinerlu ilanngullugit?
2. Ajornartorsiutip annertussusaa eqqarsaatigalugu akitsuuserinermi massakkut isumalluutit naammappat?
3. Meeqqat, inuusuttullu akornanni siusissumik pinaveersaartitsineq qanoq annertusarsinnaavarput?
4. Ikiaroornartumik atornerluisunut katsorsartinnissamik neqeroortunik naammattunik, ammasunillu peqarpugut?

Inuiaqatigiit peqqinnerunissaat, nukittunerunissaallu kissaatigigutsigu ikiaroornartumik eqqussuineq unitsissavarput. Innuttaasut ikiaroortarnissaat pinaveersaartissavarput. Atornerluisuulereersimasullu ikiussallutigit.

Partiit sinnerisa, Naalakkersuisullu sammisamut uunga pingaaruteqartumut isumaat tusassallugit qilanaaraara, neriuppungalu maani nunatsinni ikiaroornartumut siunnerfeqarnerusumik, aalajangiusimasumillu suliniuteqarnissamut akisussaaffimmik tiguseqatigiissinnaassasugut.

Oqallilluarnissassinnik kissaappassi.